



Protocol dalla radunonza communal Lumnezia (2014/01)

Datum: Venderdis, ils 13 da zercladur 2014
Liug: Halla plurivalenta dalla casa da scola Sutvitg a Vella
Cuoz: 20:00 – 23:05 uras
Presents: 118 votantas e votants, in representant dallas medias
Parsura: Duri Blumenthal, president communal
Actuar: Marcus Cavegn, canzlist communal

Tractandas

1. Avertura ed elecziun dils dumbravuschs

Il president communal Duri Blumenthal fa beinvegni als pariciponts dalla radunonza communal ed engrazia a quels che han dau suatientscha al clom e fan veler lur dretgs politics. El constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

La gliesta da tractandas dils 23 da matg 2014 presentada dalla suprastonza communal vegn approbada dalla radunonza communal.

Perstgisai ein Gioni Capaul, commember dalla suprastonza communal, ch'ei egl exteriur, e Rino Caviezel, commember dalla cumissiun da gestiun, pervia malsogna.

La radunonza elegia dus dumbravuschs:

- Rudolf Caduff-Bearth, Cumbel;
- Ueli Caduff-Riedi, Morissen.

2. Protocol dalla radunonza communal dils 13 da december 2013 (2013/04)

Il president communal Duri Blumenthal constatescha, ch'igl ei buca vegniu inoltrau recuors en scret aschia ch'il protocol dalla davosa radunonza communal dils 13 da december 2013 (2013/04) vala sco approbaus.

3. Rapport annual 2013

1) Quen annual 2013

Il rapport annual 2013 ei vegnius tarmess a mintga casada. Quel cuntegn il rapport dil president communal e dils nov departaments comunals, la gliesta dils funcziunaris e da collaboraturs, il quen annual, rapport digl Uffeci da vischnauncas dil Grischun ed il rapport dalla cumissiun da gestiun.

Il resultat cumplet 2013 sepresenta sco suonda.

a) Quen current

Recav	CHF23'853'175.97
Cuosts	CHF18'624'327.05
<u>Surpli recav</u>	<u>CHF 5'228'848.92</u>

b) Quen d'investiziun

Entradas	CHF 6'504'104.65
Expensas	CHF 3'519'381.30
<u>Surpli entradas</u>	<u>CHF 2'984'723.35</u>

c) Amortisaziuns	CHF 6'428'502.90
d) Cashflow	CHF 6'428'502.90
e) Surpli da finanziaziun	CHF 14'674'998.67

La bilanza muossa in augment dalla facultad finanziaria per CHF 5'605'123.16 a CHF 23'872'282.80 ed ina diminuziun dalla facultad administrativa per CHF 6'779'645.10 a CHF 10'589'309.75. Il capital jester ei sereducius per CHF 9'057'752.61 a CHF 6'809'817.86, las finanziaziuns specialas ein s'augmentadas per CHF 2'654'381.75 a CHF 10'763'373.27, ed igl agen capital ei s'augmentaus per CHF 5'228'848.92 a CHF 34'461'692.55. Igl augment digl agen capital corrispunda al surpli da recav el quen current.

2) Rapport da revisiun dalla cumissiun da gestiun

Daniel Blumenthal, president dalla cumissiun da gestiun, persenta il rapport da revisiun. El fa in compliment per il rapport annual. La cumissiun da gestiun ha examinau il quen cun tutta precauziun. Igl uffeci da vischnauncas dil Grischun sco post da revisiun ed ha recumandau en siu rapport alla cumissiun da gestiun, da far ina damonda en scret per mauns dalla radunonza communal per schar apporbar il quen annual.

La cumissiun da gestiun ei sefatschentada egl'emprems onn cul reglament da salarisaziun, ha controllau ils quens annuals 2012 dallas anteriuras otg vischnauncas ch'ei vegnidas fusiunadas alla vischnaunca da Lumnezia sco era ils quens annuals 2012 dils consorzis dissolvi cun la fusiun da vischnauncas Lumnezia, sin basa digl art. 61 dalla constituziun dalla vischnaunca Lumnezia. Egl'emprems onn ha la vischnaunca giu grondas activitads. La vischnaunca stat el mument sin bunas combas financialas, il resultat dil quen current ei megliers ch'il preventiv. Il cussegl grond ha acceptau ils 5 da december 2013 la lescha davart la refurma dall'ulivaziun da finanzas el cantun Grischun. Per la vischnaunca da Lumnezia purtass la revisiun dall'ulivaziun intercomunala da finanzas dapli entradas. Encunter quella lescha ei vegnius inoltraus il referendum, aschia ch'ella vegn presentada ils 28 da settember 2014 alla votaziun dil pievel. La solidaritad denter las vischnauncas rehas e meins beinstontas ei apparentamein buca gronda.

La cumissiun da gestiun propona d'approbar il quen annual 2013, da dar scarica alla suprastanza communal ed all'administraziun communal, sco era a tuts ufficials e funcziunaris da vischnaunca, admettend a tuts in duiu engraziament per la lavur prestada duront igl onn.

Rest Martin Cabalzar fa in compliment per il rapport ed il quen annual, che dattan ina fetg buna survesta dil curriu e passau dalla vischnaunca. Ina tematica actuala seigi il project social dall'associaziun Miraval per integrar giuvenils senza occupaziun ellas localitads dalla anteriura casa da vegls e da tgira a Cumbel, oravontut las circumstanzias che hagian menau alla vendita dil baghetg. En damonda stetti sche quei seigi ina buna soluziun e sche la moda per la vischnaunca da Lumnezia e la fundaziun „da casa val lumnezia“ da sedeliberar d'ina grevezia e da surdar la responsabladad a persunas privatas seigi en uorden. Cun quella vendita spargni la vischnaunca in milliun francs e sedelibereschi dalla responsabladad, la fundaziun „da casa val lumnezia“ sedescarghi d'ina part dil deivet e sappi curclar il deficit da menaschi per ina casa che duessi saver purtar sesezza, ils impressaris lumnezians sappien mussar ch'els investeschien en Lumnezia. Ei setschenti la damonda sch'els seigien prompts d'investar ton sco la vischnaunca. Il project dall'associaziun Miraval pari d'esser morts. L'anteriura casa da vegls e da tgira a Cumbel duessi vegnir occupada ton pli spert, schiglioc mondi ella en decadenza. Dubiteivel seigi, sche la restricziun d'utilisaziun per la casa en favur dalla vischnaunca da Lumnezia seigi valeivla avon dertgira. La critica mondi alla suprastanza communal, che decidi cun

la maioritad el cussegl da fundaziun „da casa val lumnezia“, da vender la casa malgrad la clara decisiun dalla radunonza communal. Cheutras vegnien aviartas las portas alla speculaziun. Il project Miraval seigi vegnius dischavuaus ed aschia diesch plazs da lavur i a piarder. La suprastonza communal haigi fatg encunter la decisiun dalla radunonza communal senza presentar aunc inagada la damonda ad ella. La critica mondi era al cussegl da fundaziun „da casa val lumnezia“. Tenor schazetg uffical havevi la casa ina valeta da 2.6 milliuns francs, sin fundament d'in schazetg privat seigi la valeta mo aunc 0.5 milliuns francs. L'argumentaziun dil president dil cussegl da fundaziun seigi buca capeivla, che la casa vali ussa meins ch'ina casa d'ina famiglia. La fuorma da scriver ora la casa fetschi endament in bazar digl orient. La fundaziun sappi denton buca vegnir menada sco ina fatschenta privata, cun quei ch'ella haigi il susteniment dalla publicitad. Ton la suprastonza communal sco il cussegl da fundaziun haigien periclitau la confidonza ellas autoritads. La consequenza seigi il desinteress per dretgs politics. El spetgi ina informaziun pli transparenta per recuperar la confidonza.

Il president communal fa attents, che fundaziun „da casa val lumnezia“ seigi suttamess al dretg privat. Sco commember dalla suprastonza communal haigi el ina responsablada politica, sco commember dil cussegl da fundaziun haigi el ina responsablada persunala.

Il president dil cussegl da gestiun constatescha, che la suprastonza communal haigi tenu en las cumpetenzas en quei cass.

3) Approbar il quen annual 2013 e dar scarica alla suprastonza communal

La radunonza communal approbescha il quen annual 2013 e dat scarica alla suprastonza communal cun 96 vuschs encunter neginas.

4. Revisiun parziala dalla planisaziun communal d'utilisaziun ad Uors: zona per baghetgs e stabiliments publics

Sin parcella nr. 207 ad Uors ei prevedius il project per il baghetg da pumpiers, plaz fermada pigl auto da posta e tualetta publica. Per saver realisar il project ella fuorma prevedida ei necessaria ina midada dil plan da zonas, dil plan general d'avertura pil traffic ed in supplement ella lescha da baghegiar Suraua, art. 53.

La suprastonza communal ha instradau a revisiun parziala dalla planisaziun communal d'utilisaziun a Suraua. Sebasond sin art. 13 dall'ordinaziun cantunala davart la planisaziun dil territori (OPTGR) ha giu liug l'exposiziun da cooperaziun naven dils 9 da matg entochen ils 9 da zercladur 2014 (30 dis). Duront il temps da publicaziun ha mintgin giu la pusseivladad d'inoltrar en scret alla suprastonza communal propostas ed objecziuns motivadas. Da quella pusseivladad ha negin fatg diever.

1) Midada dil plan da zonas Uors 1:1'000

La parcella nr. 207 ella zona da vitg duei vegnir attribuida alla zona per baghetgs e stabiliments publics.

La radunonza communal decida cun gronda maioritad e senza cuntravusch, d'approbar la midada dil plan da zonas Uors 1:1'000 (plan nr. 1042_2.1 revisiun parziala plan da zonas Uors 1:1'000) tenor project per la revisiun parziala dalla planisaziun locala.

2) Midada dil plan general d'avertura pil traffic Uors 1:1'000

Il plan general d'avertura pil traffic Uors, che vala da present, cuntegn dus plazs da fermada per autos da posta silla via cantunala egl areal dallas parcelas nr. 215, 216 e 222. Quels plazs da fermada duein vegnir sligiai. El plan general d'avertura pil traffic Uors duei vegnir fixau in plaz da fermada sin parcella nr. 207.

La radunonza communal da decida cun gronda maiortad e senza cuntravusch, d'approbar la midada dil plan general d'avertura pil traffic Uors 1:1'000 (plan nr. 1042_2.2 revisiun parziala plan general d'avertura traffic Uors 1:1'000) tenor project per la revisiun parziala dalla planisaziun locala.

3) Supplement ella lescha da baghegiar Suraua, art. 53 Tetgs

En art. 53 al. 2 dalla lescha da baghegiar Suraua duei vegnir fixau, che tetgs plats ein admissibels ella zona per baghetgs e stabiliments publics. La radunonza communal da decida cun gronda maiortad e senza cuntravusch, d'approbar il supplement ella lescha da baghegiar Suraua (cumplettaziun dalla lescha da baghegiar Suraua, art. 53), tenor project per la revisiun parziala dalla planisaziun locala.

Alinea 2

*In den Wohnbauzonen sind nur Giebel- und Walmdächer mit einer Neigung von 25 bis 60% zulässig. In der Gewerbezone **und in der Zone für öffentliche Bauten und Anlagen** sind Flachdächer erlaubt.*

5. Revisiun parziala dalla planisaziun communal d'utilisaziun a Cumbel:

engrondiment dalla zona da deponia per material da scavament a Porclas

– Midada dil plan da zonas e plan general da formaziun 1:500

A Sanetsch el vischinadi da Cumbel ei prevedius in engrondiment dalla deponia per material inert „Porclas“. Per saver realisar quei engrondiment ei necessaris ina midada dil plan da zonas. Dils 9 da matg entochen ils 9 da zercladur 2014 (30 dis) ei il project da revisiun staus publicaus per l'exposiziun publica da cooperaziun dalla planisaziun locala (cun exposiziun d'informaziun damonda da runcar uaul), cuntinend il plan da zonas e plan general da formaziun 1:500, il rapport da planisaziun e cooperaziun e sco ulteriurs documents ils profils traversals 1:500 / la quintaziun da quantidad (tabella), il giudicament geologic / geotecnic, sco era igl extract carta naziunala, il plan da runcar uaul 1:500 ed il formular da runcar uaul.

Alla suprastanza communal ein buca vegnidas inoltradas propostas ni objecziuns motivadas. Ella propona d'approbar la revisiun parziala dalla planisaziun communal d'utilisaziun a Cumbel.

La radunonza communal approbescha cun gronda maiortad encunter ina vusch la revisiun parziala dalla planisaziun communal d'utilisaziun a Cumbel tenor proposta dalla suprastanza communal

6. Project per baghetg da pumpiers, plaz fermada pigl auto da posta e tualetta publica ad Uors

La suprastanza communal propona il project per in baghetg da pumpiers, plaz da fermada pigl auto da posta e trottoir sper via cantunala ad Uors. Il baghetg da pumpiers duei vegnir fatgs cun ina construcziun en itschal, cun la proposta alla radunonza communal d'approbar il project e da conceder in credit da baghegiar da CHF 1'044'000.

L'Assicuranza d'edificis dil Grischun dat ina contribuziun dalla polizia da fiug vid il baghetg da pumpiers da. 44 % dils cuosts per quei baghetg da CHF 589'600.00, che dat CHF 259'424.00

La regenza dil cantun Grischun ha approbau il project per il plaz da fermada ed il trottoir ed ha concediu ina contribuziun per la construcziun conform art. 30 dalla lescha catunala da vias. Tenor art. 33 da quella lescha ei la contribuziun 35 % dils cusots imputabels e renconuschi da CHF 400'000.00, pia CHF 140'000.00.

Alla vischnaunca resta ei aschia da finanziar ina summa da rodund CHF 644'000.00.

La radunonza communal appropescha cun gronda maioritad il project per il baghetg da pumpiers, plaz fermada pigl auto da posta e tualetta publica ad Uors e conceda in credit da baghegiar da CHF 1'044'000.00.

7. Lescha communal d'energia Lumnezia

La suprastonza communal propona ina lescha communal d'energia Lumnezia. Quella duei formar la basa per la politica d'energia dalla vischnaunca cun la finamira da promover in'utilisaziun d'energia ecologica ed economica. Igl intent ei da promover il diever d'energias regenerablas sco era mesiras da spargnar energia. Plinavon duei vegnir unificada la pratica da contribuziuns finanzialas dalla vischnaunca. Tochen dacheu enconuschevan entginas anteriuras vischnauncas dalla Lumnezia ina lescha communal. Per saver tractar tuts egualmein eis ei necessari da relaschar ina nova basa legala per l'entira vischnaunca Lumnezia.

Per saver finanziair las mesiras da promoziun sil sector energetic duei la vischnaunca impunder la taxa che vegn incassada pil diever da terren public sin intschess communal per la construcziun ed il menaschi dalla reit da distribuiziun. Persuenter vegn incassau dil consument da forza electrica ina taxa denter 0,5 e 2 raps per kWh. Quella taxa ei fixada ad 1 rap per kWh. Aschia stattan a disposiziun mintg'onn rodund CHF 150'000 per promover energias regenerablas e mesiras da spargn. La vischnaunca impunda las taxas incassadas en favur dil generalester ni per igl agen menaschi. Quei sa esser per:

- a) promover edificis e stabiliments cun producciun d'energias regenerablas;
- b) promover la sanaziun d'edificis, indrezs technics ed apparaturas el tenercasa, aschilunsch ch'il diever d'energia vegn sbassaus considerablamein ni ch'in meglier grad d'utilisaziun vegn contonschius;
- c) sustener programs d'energia persistents da fatschentas;
- d) indrezs da pilot e da demonstraziun per energias regenerablas;
- e) cussegliair privats e fatschentas davart spargnar energia;
- f) curclar cuosts dil communalesser per optimar objects publics per spargnar energia;
- g) curclar cuosts per l'illuminaziun da vias.

Damondas per contribuziuns ein da tschentar avon ch'entscheiver cun las lavurs da baghegiar ni avon che far autras investiziuns. Damondas per contribuziuns per apparaturas el tenercasa ein da tschentar alla suprastonza communal 30 dis suenter la cumpra.

Contribuziuns obtenidas ein da restituir sche quellas ein vegnidas retratgas sin fundament d'indicaziuns faulsas ni sch'igl object vegn nezegiaus per in auter intent ch'indicau ni vegn allontanus ni mess ord funcziun enteifer tschun onns suenter il pagament dalla contribuiziun. Cuntravenziuns san vegnir punidas cun castitgs entochen frs. 10'000.00.

La suprastonza communal vegn a relaschar disposiziuns executivas tier la lescha d'energia.

La radunonza communal Lumnezia decida cun 112 vuschs senza cuntravuschs da deliberar la lescha d'energia per mauns dalla cuminonza dils votants all'urna.

8. Lescha da taxas turisticas

La suprastonza communal presenta la proposta per la lescha da taxas turisticas. Enteifer las vischnauncas Andiast, Breil/Brigels, Ilanz/Glion, Lumnezia, Mundaun, Obersaxen und Waltensburg/Vuorz ei vegnida fatga ina procedura da consultaziun. Sin fundament dallas propostas inoltradas eran vegnidas fatgas diversas adattaziuns dalla lescha turistica.

- La lescha turistica preveda la pussevividad che las vischnauncas san crear maximalmein treis zonas turisticas sin lur territori communal. Per la calculaziun dallas taxas da hosps vegn la tariffa tenor las disposiziuns executivas (100%) applicada en

la zona 1. Per la zona 2 ei definida ina reducziun da 15% sin la tariffa tenor las disposiziuns executivas, per la zona 3 ina reducziun da 30%.

- Las dimensiuns definidas ella rama dalla lescha ein vegnidas reducidas: Il cunfin ault dalla tariffa ei vegnius reducius ton tier la taxa da hosps sco era tier la taxa turistica per rodund 20 procent.
- Per habitaziuns da vacanzas ei vegnius introducivus in cunfin ault dallas surfatschas da habitar nettas ch'ei da quintar giu. Habitaziuns da vacanzas cun varga 150 m² quentan giu la taxa da hosps e la taxa turistica per 150 m².
- Per habitaziuns che vegnan affittadas vegn concedida ina reducziun dalla taxa da hosps da 25%. La taxa da hosps munta aschia aunc a CHF 9.00 per m² surfatscha da habitar netta, enstagl da CHF 12.00. Corrispudentamein sereduceschan era las tariffas dallas zonas 2 e 3.
- La tariffa dalla pauschala da famiglia vertenta ei vegnida reducida da CHF 9.00 a CHF 8.00 per m² surfatscha da habitar netta e vegn numnada da niev pauschala annuala. Ei vegn buca differenziau pli denter la pauschala da famiglia obligatoria (art. 10) e la pauschala da hosps extendida (art. 11). Las pernottaziuns da hosps che s'audan buca tier la famiglia e che stattan sur notg gratuitamein vegnan curcladas cun la pauschala annuala, quei che munta ina ulteriura reducziun dalla tariffa da CHF 1.50 per m². Las pauschalas da hosps extendida vegn strihada, aschia che la pauschala annuala obligatoria per agen spazi da habitar vegn reducida per CHF 2.50.
- Per l'agricultura ei vegnida introducida ina regulaziun simplificada: Menaschis agricols quentan giu da niev la mesadad dalla pauschala da basa, quei vul dir CHF 125.00 enstagl da CHF 250.00. Menaschis cun purschidas agroturisticas sco alloschaments (habitaziuns da vacanzas, campadis, combras da hosps, eav.), gastronomia, stizuns da beins purils e semegliant pagan supplementaramein tier la mesa pauschala da basa la taxa turistica per la cumpart variabla tenor art. 17, alineia 2, litera b).

Quellas adattaziuns ein succedidas sin fundament dallas propostas inoltradas. Schebein ils cuosts per las purschidas da prestaziun actualas san vegnir curclai en tut las vischnauncas vegn a semussar el mument che las cefras dallas surfatschas da habitar nettas ein enconuschentas.

Las leschas turisticas ellas siat vischnauncas dalla destinaziun Surselva duein vegnir unificadas. Ellas ein vegnidas elavuradas comunablamein. Igl ei buca pusseivel da pretendere che las ulteriuras vischnauncas, che han approbau la lescha turistica, midien lur decisiun.

Ella discussiun vegn fatg differentas menziuns. Aschia che la differenza denter las zonas turisticas seigi buca sufficiente e che l'indemnisaziun als purs per la sperdita da fretg tras pistas e loipas seigi buca reglada. Quei sa denton buca succeder ella lescha davart las taxas da hosps e taxas turisticas.

La radunonza communal deliberescha la lescha davart las taxas da hosps e taxas turisticas per la vischnaunca Lumnezia per mauns dalla votaziun all'urna cun 96 vuschs encunter ina vusch.

9. Damonda da credit per mobigliar ed indrezs ella nova casa communal Palius a Vella

Il mobigliar e divers indrezs ella nova casa communal Palius a Vella eran buca cumpri ella calculaziun dils cuosts da baghegiar dil baghetg, cunquei ch'ins quintava da saver duvrar igl uorden dallas canzlias veglias.

- Scaffas da preit e crunas
- Mobiglias da biro (pults, measas etc.)
- Crunas rullontas per igl archiv
- Indrezs da telefonia

- UPS (alimentaziun electrica senza interrupziun), hardware electronica
- Concept d'inscripziuns

La suprastanza communal fa la damonda da credit per quellas expensas, cun quei che la cumpetenzza finanziaria dalla suprastanza communal da CHF 150'000.00 vegn survargada.

La radunonza communal decida cun gronda maioritad da conceder in credit da CHF 300'000.00 per mobigliar ed indrezs ella nova casa communal a Palius a Vella.

10. Orientaziuns

1) Anteriura casa da vegls e da tgira a Cumbel

Il president communal Duri Blumenthal dat ina survesta cronologica dil curriu e passau dapi che la radunonza communal dils 18 d'ost 2013 ha giu decidiu da dar ina contribuziun da CHF 1'000'000.00 per sustener l'associaziun Miraval (uniun da promover il project da giuvenils Lumnezia) da sviluppar e promover in project social per integrar giuvenils senza occupaziun ellas localitads dalla anteriura casa da vegls e da tgira a Cumbel, cun las cundiziuns menziunadas ed explichescha las circumstanzias dalla vendita dall'anteriura casa da vegls e da tgira a Cumbel dalla fundaziun "da casa val lumnezia" als investurs privats. La finala ha il cussegl da fundaziun "da casa val lumnezia" decidiu da vender la casa alla societad Val Verda SA.

La suprastanza communal ha decidiu ils 10 da mars 2014 da schar impurtar el cudisch funsil Lumnezia ina servitud persunala en favur dalla vischnaunca da Lumnezia cun ina limitaziun d'utilisaziun tenor art. 781 CCS per il mintgamai proprietari dalla parcella nr. 2011 Crest la Geina, a Cumbel. La limitaziun d'utilisaziun ha suadont cuntegn.

Cugl intent da proteger la populaziun d'eventualas consequenzas negativas dalla dimora d'in grond diember da persunas da culturas jastras enamiez in vitg ruasseivel astga la parcella nr. 2011 buca vegnir duvrada egl avegnir per ina casa d'asilants ni fugitivs.

Quella servitud ei buca trasportabla e vegn constituida per temps nunlimitau.

La survigilanza cantunala da fundaziuns, che veva buca acceptau il construct prevediu cun in dretg da baghegiar alla associaziun Miraval, ha confirmau, ch'ella va d'accord cun la vendita dalla casa.

Daniel Blumenthal presenta la vesta dils investurs dalla Val Verda SA, nua ch'el ei separticipaus ensemen cun Gion Martin Collenberg da Lumbrein ils quals han cumprau il baghetg ed han l'intenziun da perseguitar il project da sviluppar e promover in project social per integrar giuvenils senza occupaziun ellas localitads dalla anteriura casa da vegls e da tgira a Cumbel. Denton ein las persunas da clav buca prontas da realisar il project senza ina contribuziun dad in milliun francs dalla vischnaunca. Il prezi da cumpra dalla societad Val Verda SA per la casa ei staus in milliun francs. Il schazetg digl object tras in expert privat ei staus 0.5 milliuns francs. La casa ha ina gronda cubatura da var 13'000 m³. La sostanza dil baghetg ei buna. Il prezi per la casa ei da relativar. Sin l'immobiglia ein restricziuns d'utilisaziun. Ils novs proprietari lessen investir en Lumnezia ed ein aviarts da realisar in project da giuvenils.

Rest Martin Cabalzar engrazia per las informaziuns. La suprastanza communal seigi buca senza cuolpa dallas speculaziuns che seigien vegnidas fatgas en Lumnezia. Ils detagls erien aunc buca enconuschents ils 18 d'ost 2013, cura che la radunonza communal ha giu priu siu conclus da dar in susteniment all'associaziun Miraval. Ei fussi stau impurtont da discutir ed informar meglier.

Oscar Caduff ei dil meini che tuts duessien vegnir tractai tuttina. Ei seigi buca stau aschia en quest cass.

2) Ulteriuras orientaziuns

- Deponias per curdems d'iert e caglias
- Fiasta lumneziana ils 27 e 28 da settember 2014 ed inauguraziun dalla nova casa communal a Vella
- Fiasta da commemoraziun 100 onns dil scribent Toni Halter ils 25 d'october 2014
- Loghens da menar las scolas da vischnaunca
- Recuors encunter surdada dallas lavurs per la sanaziun ed il slargament da vias da meglieraziun a Surcasti
- Installaziun da containers da rimnar rumien da casa dil tip molok a Vrin, Lumbrein e Suraua
- Preparativas per la lescha davart il provediment d'aua e la lescha per la dismessa d'auas piarsas
- Preproject per niev reservuar d'aua a Lumbrein
- Preproject per sanaziun dalla via nr. 10 a Lumbrein

11. Varia

- Fuorma da tetg dil niev restaurant a Triel el vischinadi da Vella
- Sanaziun dalla via nr. 10 a Lumbrein
- Plazs da baghegiar a Vella
- Contuorn dil portal a Porclas
- Engraziament als participonts dalla radunonza communal

7144 Vella, ils 13 da zercladur 2014

Il president:

Igl actuar:

Duri Blumenthal

Marcus Cavegn